



*Comme Moÿse mourut aagé de six vingts ans ; & Iosue luy succeda pour la conduite du peuple.*

**M**OÿSE se voyant aagé de six vingts ans , recita tous les benefices que le Seigneur auoit faits à son peuple & en fit vn Cantique fort excellent pour seruir à la posterité d'Israël, auquel Moÿse dit , Accomplissez toutes les paroles escrites en la Loy , & commandez à vos enfans de ne se fourvoyer d'icelle, car elle n'a pas esté pour neant commandée : en ce faisant , vos iours seront prolongez sur la terre, en laquelle vous passerez outre le Iordain. En ce iour le Seigneur fit monter Moÿse sur la montagne d'Abarim & d'icelle luy monstra la terre de Chanaan. Or Moÿse se sentant la fin de ses iours, donna benediction à chacune des lignées d'Israël, leur predisant ce qui leur estoit à aduenir; & depuis estant monté de la plaine de Moab en la montagne de Nebo, au sommet de Phasta, contre Iericho, le Seigneur luy fit voir toute la terre de Galaad iusqu'à Dan, luy disant : Voila la terre promise, tu l'as veüe de tes yeux, maistu n'y entreras point. Or Moÿse seruiteur du Seigneur, mourut en la terre de Moab, où il fut enseuely en la vallée de la terre contre Phogor, où nul iusques au iour d'huy n'a conneu son sepulchre. Sa veüe n'estoit point obscurcie, ny ses dents n'auoient point branlé. Israël le pleura par trente iours, & Iosué print sa charge, qui fut remply de l'esprit de sapience, car Moÿse auoit mis la main sur luy, & Israël luy obeit comme à son conducteur.

*Deuter. 31. 32. 33. & 34. Chap.*